



XALQ DEPUTATLARI KATTAQO‘RG‘ON TUMANI KENGASHINING QARORI

2025-yil 19-fevral

VII-6-24-7-96-K/25

Kattaqo‘rg‘on tumani

Xalq deputatlari tuman Kengashi huzurida ekspert guruhi tashkil qilish to‘g‘risida

O‘zbekiston Respublikasi Oliy Majlisi Senati Kengashining 2025-yil 28-yanvardagi “Xalq deputatlari viloyat, tuman va shahar Kengashi huzurida ekspert guruhi tashkil qilish to‘g‘risida”gi KQ-52-V-sonli Qarori hamda “Mahalliy davlat hokimiyati to‘g‘risida”gi O‘zbekiston Respublikasi Qonunining 6- va 24-moddalariga muvofiq, Xalq deputatlari tuman Kengashining yettinchi chaqiriq oltinchi sessiyasi

QAROR QILADI:

1. O‘zbekiston Respublikasi Oliy Majlisi Senati Kengashining 2025-yil 28-yanvardagi KQ-52-V-sonli qarori ma’lumot va ijro uchun qabul qilinsin.
2. Xalq deputatlari tuman Kengashi huzuridagi ekspert guruhi to‘g‘risidagi Nizom 1-ilovaga muvofiq tasdiqlansin.
3. Xalq deputatlari tuman Kengashi huzuridagi jamoatchilik asosida tashkil qilingan ekspert guruhi 2-ilovaga muvofiq tasdiqlansin.
4. Mazkur Qarorning ijrosini nazorat qilish xalq deputatlari tuman Kengashining reglament va deputatlik odobi-axloqi masalalari bo‘yicha doimiy komissiyasi (R.G‘ulomov), Kotibiyat mudiri M.Teshayev zimmasiga yuklansin.
5. Ushbu Qaror qabul qilingan kundan e’tiboran kuchga kiradi.

Kengash raisi



NASRIDDINOV
JAMSHID
TULKINOVICH

Xalq deputatlari Kattaqo'rg'on tumani
Kengashining
2025-yil 19-fevraldagi
VII-6-24-7-96-K/25 -son qaroriga
1-ilova

**Xalq deputatlari Kattaqo'rg'on tuman Kengashi huzuridagi
ekspert guruhi to'g'risida
NIZOM**

1-bob. Umumiy qoidalar

1. Xalq deputatlari tuman Kengashi huzuridagi ekspert guruhi to'g'risidagi Nizom (bundan buyon matnda Nizom deb yuritiladi) Xalq deputatlari tuman Kengashi huzuridagi ekspert guruhi (bundan buyon matnda Ekspert guruhi deb yuritiladi) faoliyatini tartibga soladi.

2. Ekspert guruhi xalq deputatlari tuman Kengashi (bundan buyon matnda tuman Kengashi deb yuritiladi) va uning doimiy komissiyalari faoliyatini ekspert va axborot-maslahat jihatidan ta'minlash, ularning norma ijodkorligi faoliyati hamda nazorat-tahlil tadbirlarini tayyorlash va o'tkazishga ko'maklashish uchun tuzilgan, o'z ishini jamoatchilik asosida olib boradigan maslahat organi hisoblanadi.

3. Ekspert guruhi tuman Kengashi qarori bilan tashkil etiladi.

4. Ekspert guruhining xulosalari tavsiyaviy xususiyatga ega.

5. Ekspert guruhi o'z faoliyatida O'zbekiston Respublikasining Konstitutsiyasi va qonunlariga, O'zbekiston Respublikasi Oliy Majlisi palatalarining qarorlariga, O'zbekiston Respublikasi Prezidentining farmonlari, qarorlari va farmoyishlariga, O'zbekiston Respublikasi Vazirlar Mahkamasining qarorlari va farmoyishlariga, tegishli tuman Kengashi qarorlariga, mazkur Nizomga hamda boshqa qonunchilik hujjatlariga amal qiladi.

2-bob. Ekspert guruhining asosiy vazifalari, huquq va majburiyatlari

6. Quyidagilar Ekspert guruhining asosiy vazifalari hisoblanadi:
tuman Kengashi sessiyasi kun tartibiga kiritilgan masalalarni doimiy komissiyada dastlabki tarzda ko'rib chiqishda ishtirok etish;

tuman Kengashi qarorlari loyihalari O'zbekiston Respublikasi Konstitutsiyasi va qonunlariga, qonunchilik hujjatlariga, mamlakatimizda amalga oshirilayotgan islohotlarning maqsad va vazifalariga mosligi nuqtai nazaridan o'rganib chiqish va tavsiyalar berish;

qonunlarni ularda korrupsiyaga, gender tenglik buzilishiga, boshqa huquqbuzarliklarni sodir etishga shart-sharoit yaratuvchi, shuningdek, tadbirkorlik subyektlari uchun ortiqcha ma'muriy va boshqa cheklovlarni joriy etuvchi qoidalar va normalarni aniqlash nuqtai nazaridan tahlil etish;

tuman Kengashilar, uning doimiy komissiyalari faoliyatini tashkil qilish bo'yicha xalqaro tajribani o'rganish va zarur hollarda ularni vakillik organlari faoliyatida qo'llash bo'yicha takliflar tayyorlash;

tuman Kengashi qarorlari loyihalarini ishlab chiqishda doimiy komissiyalarga ko'maklashish;

tuman Kengashi, uning doimiy komissiyalariga nazorat-tahlil tadbirlarini tayyorlash va o'tkazishda ko'maklashish;

tuman Kengashi, uning doimiy komissiyalari va deputatlarining fuqarolar, nodavlat notijorat tashkilotlari va fuqarolik jamiyatining boshqa institutlari bilan o'zaro hamkorligini tahlil qilish, ular o'rtasida hamkorlikni takomillashtirish yuzasidan takliflar ishlab chiqish;

fuqarolarning huquqlari, erkinliklari va qonuniy manfaatlariga daxl qiluvchi eng muhim masalalar yuzasidan tuman Kengashining faoliyati haqidagi jamoatchilik fikrini o'rganish va har tomonlama tahlil qilish;

tuman Kengashi deputatlari tomonidan aholi bilan o'tkaziladigan uchrashuv va sayyor qabullar, tushuntirish ishlari va ma'naviy-ma'rifiy tadbirlarda ishtirok etish, ularning samaradorligini oshirish yuzasidan takliflar ishlab chiqish;

davlat va hududiy dasturlar loyihalarini, tadbirlar rejalarini va davlat organi faoliyatiga taalluqli, shu jumladan korrupsiyaga qarshi kurashish to'g'risidagi boshqa hujjatlarni ishlab chiqish yuzasidan takliflar tayyorlash, qabul qilingan dasturlarni amalga oshirishda vakolatlari doirasida ishtirok etish, bajarilgan ishlarning samaradorligini tahlil qilish, shuningdek, yo'l qo'yilgan xato va kamchiliklarni bartaraf etish yuzasidan takliflar ishlab chiqish;

davlat organi rahbarlari va xodimlarining fuqarolar bilan uchrashuvlarini, shuningdek, jismoniy va yuridik shaxslar murojaatlarini ko'rib chiqish bilan bog'liq ishlarni tashkil etishda-qatnashish, ularning amalga oshirilishi ustidan monitoring o'tkazish;

tuman Kengashi, uning doimiy komissiyalari va deputatlari tomonidan o'tkaziladigan konferensiya, seminar, "davra suhbatlari"ni tashkil etishda ko'maklashish va ularda ishtirok etish.

7. Ekspert guruhi zimmasiga yuklatilgan vazifalarni bajarish uchun:

tuman Kengashi, uning doimiy komissiyalaridan o'z faoliyatini amalga oshirish uchun zarur bo'lgan axborotni so'rash va olish;

tuman Kengashi, uning doimiy komissiyalari tomonidan tashkil etiladigan majlislar va boshqa tadbirlar to'g'risidagi axborotni oldindan olish hamda mazkur tadbirlarda belgilangan tartibga qat'iy rioya etgan holda ishtirok etish;

tuman Kengashi, uning doimiy komissiyalari ishchi guruhlarini tarkibida davlat organlari va boshqa tashkilotlarga borish;

tuman Kengashiga Ekspert guruhi zimmasiga yuklangan vazifalar yuzasidan takliflar kiritish;

tuman Kengashining tegishli doimiy komissiyasi majlisida ishtirok etish va unda ko'rib chiqilayotgan masala yuzasidan fikr bildirish;

tuman Kengashi hamda uning doimiy komissiyasi faoliyati samaradorligini oshirish bo'yicha takliflar va tavsiyalarni ishlab chiqish hamda amalga oshirish uchun zarur bo'lgan davlat organining axborotlari, statistika va boshqa materiallarini belgilangan tartibda olish;

tuman Kengashi raisining ruxsati bilan ommaviy axborot vositalarida Ekspert guruhi nomidan chiqishlar qilish huquqiga ega.

Ekspert guruhi qonunchilik hujjatlariga muvofiq boshqa huquqlarga ham ega bo'lishi mumkin.

8. Ekspert guruhi o'z faoliyatini amalga oshirishda:

qonunchilik hujjatlari talablariga qat'iy rioya qilishi;

tuman Kengashi faoliyati bilan bog'liq qonunchilik hujjatlarida belgilangan cheklovlarga amal qilishi;

tuman Kengashi yoki boshqa davlat organlarining o'z vakolatlari doirasida amalga oshiradigan faoliyatiga aralashmasligi;

tuman Kengashi, uning doimiy komissiyalari va kotibiyati faoliyat ko'rsatishi uchun to'sqinlik qilmasligi;

fuqarolarning or-nomusi va qadr-qimmatini tahqirlashga, ularning shaxsiy hayotiga aralashishga yo'l qo'ymasligi;

o'z faoliyati davomida olingan axborotning, agar bunday axborotni tarqatish qonun bilan cheklangan bo'lsa, maxfiyligiga rioya qilishi shart.

Ekspert guruhining zimmasida qonun hujjatlariga muvofiq boshqa majburiyatlar ham bo'lishi mumkin.

3-bob. Ekspert guruhining tarkibini shakllantirish va ishini tashkil etish tartibi

9. Ekspert guruhining tarkibiga rais, rais o'rinbosari, kotib va a'zolari kiradi.

10. Ekspert guruhi a'zolariga, qoida tariqasida, tuman Kengashi deputatlari, tuman Kengashi kotibiyati xodimlari, faxriy deputatlar, ilmiy va ta'lim muassasalarining malakali mutaxassislari, jamoatchilik faoliyati sohalarida katta amaliy tajribaga ega obro'-e'tiborli fuqarolar, shuningdek, nodavlat notijorat tashkilotlari, ommaviy axborot vositalari va fuqarolik jamiyatining boshqa institutlari vakillari qabul qilinadi.

Ekspert guruhi tarkibi, qoida tariqasida:

xalq deputatlari tuman Kengashi huzurida tashkil qilinganda – 10 kishidan oshmasligi lozim.

11. Ekspert guruhining tarkibi tuman Kengashi qarori bilan har yili tasdiqlanadi.

Ekspert guruhining faoliyatiga rahbarlik tuman Kengashi raisi, Ekspert guruhiga mas'ul kotiblik tuman Kengashi kotibiyati mas'ul xodimlaridan biri tomonidan amalga oshiriladi.

12. Quyidagi holatlarda Ekspert guruhining a'zolari uning tarkibidan chiqariladi:

ular tomonidan Ekspert guruhi tarkibidan chiqish to'g'risida ariza berilganda;

Ekspert guruhining majlislarida muntazam ravishda ishtirok etmaganda;

mazkur Nizomda belgilangan majburiyatlarni, shuningdek Nizom talablarini bir-necha bor buzganda;

ularga nisbatan chiqarilgan sudning ayblov hukmi qonuniy kuchga kirganda;

vafot etganda, shuningdek, sudning qonuniy kuchga kirgan hal qiluv qarori asosida ular muomalaga layoqatsiz, bedarak yo‘qolgan yoki vafot etgan deb topilganda.

13. Ekspert guruhining tasdiqlangan a‘zolari haqidagi ma’lumotlar, shuningdek, ularning aloqa ma’lumotlari tuman Kengashining rasmiy veb-saytida (E-kengash elektron platformasida) e’lon qilinishi mumkin.

14. Ekspert guruhining raisi:

Ekspert guruhining faoliyatini tashkil qiladi va unga umumiy rahbarlik qiladi;

Ekspert guruhining majlislarini chaqiradi va kun tartibini belgilaydi;

Ekspert guruhining majlislarida raislik qiladi;

Ekspert guruhining ish rejasini, majlisi bayonnomasini va boshqa hujjatlarini tasdiqlaydi;

Ekspert guruhi a‘zolarining zimmasiga yuklatilgan vazifalarni bajarilishini muvofiqlashtiradi;

Ekspert guruhining samarali ishini ta’minlash bo‘yicha boshqa vakolatlarni amalga oshiradi.

15. Ekspert guruhining raisi bo‘lmagan taqdirda, uning vakolatlari va majburiyatlarini rais o‘rinbosari bajaradi.

16. Ekspert guruhi raisining o‘rinbosari rais yo‘qligida Ekspert guruhining majlislarida raislik qiladi, Ekspert guruhining faoliyatini samarali tashkil qilish bo‘yicha boshqa vakolatlarni amalga oshiradi.

17. Ekspert guruhining kotibi:

Ekspert guruhining faoliyatini uslubiy, tashkiliy-huquqiy va tashkiliy-texnik jihatdan ta’minlash masalalarini hal qiladi;

Ekspert guruhining navbatdagi majlisiga barcha zarur materiallar o‘z vaqtida tayyorlanishini ta’minlaydi;

kun tartibiga muvofiq Ekspert guruhi majlislari o‘tkazilishini tashkil etadi;

Ekspert guruhi majlisi o‘tkaziladigan sana, joy va taklif etiladigan shaxslar ro‘yxatini Ekspert guruhining raisi bilan kelishadi;

Ekspert guruhining a‘zolarini va taklif etilgan shaxslarni Ekspert guruhi majlisi o‘tkaziladigan joy, sana va vaqt haqida xabardor qiladi;

Ekspert guruhi tomonidan tayyorlanadigan yakuniy hujjatlarning loyihalarini tayyorlaydi;

Ekspert guruhi a‘zolarining fikr-mulohazalari, takliflarini umumlashtiradi;

Ekspert guruhi xulosalarining ko‘rib chiqilishi natijalarini monitoring qiladi va uning natijalarini Ekspert guruhi majlisida ko‘rib chiqish bo‘yicha takliflar kiritadi;

Ekspert guruhi majlisining bayonnomasini rasmiylashtiradi va tasdiqlangan bayonnomaning Ekspert guruhi a'zolari hamda boshqa manfaatdor shaxslarga jo'natilishini ta'minlaydi.

Ekspert guruhining faoliyatini samarali tashkil qilish bo'yicha boshqa vakolatlarni amalga oshiradi.

18. Ekspert guruhining a'zolari o'z majlislarida ko'rib chiqiladigan masalalarni muhokama qilish va hal qilishda o'z vakolatini boshqalarga o'tkazish huquqiga ega emas.

Ekspert guruhining majlisida ishtirok etish imkoni bo'lmagan holatlarda, uning a'zosi majlis kun tartibidagi masalalar bo'yicha o'z fikrini yozma shaklda yuborishi mumkin. Bunda uning fikri majlisda ko'rib chiqiladi va ovoz berishda hisobga olinadi.

Ekspert guruhining a'zolari:

o'z zimmlariga yuklatilgan vazifalarni bajarish uchun tuman Kengashi sessiyalarida, uning doimiy komissiyalari tomonidan tashkil etiladigan majlislarda va boshqa ommaviy tadbirlarda ishtirok etadi;

Ekspert guruhi ish rejalarining loyihasi yuzasidan takliflar tayyorlaydi, ularni Ekspert guruhi majlisida ko'rib chiqish uchun kiritadi va tasdiqlangan ish rejalar bajarilishini ta'minlaydi;

tuman Kengashi, uning doimiy komissiyalari faoliyatining samaradorligini oshirish bo'yicha takliflar va tavsiyalarni ishlab chiqishda hamda amalga oshirishda qatnashadi;

Ekspert guruhining kun tartibiga kiritilgan masalalar yuzasidan tahliliy va boshqa materiallar tayyorlaydi;

Ekspert guruhining zimmasiga yuklangan vazifalarga muvofiq boshqa vakolatlarni amalga oshiradi.

19. Ekspert guruhi faoliyatining asosiy masalalari uning majlisida ko'rib chiqiladi. Ekspert guruhining majlisi uning ish rejaları asosida, qoida tariqasida, har oyda kamida bir marta chaqiriladi.

Ekspert guruhining raisi Ekspert guruhi a'zolarining uchdan bir qismining yozma murojaati asosida uning navbatdan tashqari majlisini chaqirishi mumkin.

Ekspert guruhining yig'ilishlari va kun tartibidagi masalalar tuman Kengashining rasmiy veb-saytida (E-kengash elektron platformasida) e'lon qilinishi mumkin.

20. Ekspert guruhining majlislariga davlat organlari va tashkilotlari, nodavlat notijorat tashkilotlari va fuqarolik jamiyati institutlarining vakillari taklif etilishi mumkin.

21. Ekspert guruhi majlisi kun tartibining loyihasi Ekspert guruhi kotibi tomonidan Ekspert guruhi raisi va a'zolarining takliflari asosida shakllantiriladi.

22. Ekspert guruhining majlisini uning raisi olib boradi. Rais ishtirok eta olmagan holatlarda, majlisni uning o'rinbosari olib boradi.

Ekspert guruhining majlislarida tuman Kengashi deputatlari va kotibiyat xodimlari ishtirok etishi mumkin.

23. Ekspert guruhining majlisi, agar unda Ekspert guruhi a'zolarining kamida yarmi (kvorum) ishtirok etgan taqdirda vakolatli hisoblanadi.

24. Ekspert guruhining xulosasi majlisda ishtirok etayotgan Ekspert guruhi a'zolarining oddiy ko'pchilik ovozi bilan qabul qilinadi.

25. Ekspert guruhining har bir a'zosi qabul qilinayotgan xulosalar bo'yicha o'zining fikrini yozma shaklda ifodalashga haqli. Bu holatda uning fikri Ekspert guruhi majlisining bayonnomasiga majburiy tartibda qo'shib qo'yiladi.

26. Ekspert guruhining majlisida qabul qilingan xulosasi bayonnomasi bilan rasmiylashtiriladi. Ekspert guruhi majlisining bayonnomasi kotib tomonidan imzolanadi, majlisga raislik qiluvchi tomonidan tasdiqlanadi va uch kun muddatda tuman Kengashiga, Ekspert guruhi a'zolariga va manfaatdor shaxslarga yuboriladi.

27. Ekspert guruhining kotibi Ekspert guruhi a'zolari ko'magida Ekspert guruhi xulosalari ko'rib chiqilishini o'rganadi, zarur bo'lgan hollarda, Ekspert guruhining raisiga tegishli takliflar kiritadi.

4-bob. Ekspert guruhi a'zolarini rag'batlantirish

28. Tuman Kengashi, uning doimiy komissiyalari va Ekspert guruhining majlislarida doimiy ravishda ishtirok etib, tuman Kengashi hujjatlarini ko'rib chiqish va muhokama qilishda o'z takliflari bilan faol qatnashgan, tuman Kengashi uchun tavsiyalar, tahliliy materiallar ishlab chiqish, nazorat-tahlil tadbirlarini o'tkazishga ko'maklashish va ishtirok etish, qabul qilingan qonunchilik hujjatlarining mazmun-mohiyatini tushuntirishda jonbozlik ko'rsatgan Ekspert guruhi a'zolari rag'batlantirilishi mumkin.

29. Rag'batlantirish tuman Kengashi raisi, tuman Kengashi doimiy komissiyasi tashabbusi bilan tashakkurnoma e'lon qilish, turli mukofotlarga tavsiya qilish, yilda bir martalik pul mukofoti yoki qimmatbaho sovg'a berish tarzida amalga oshiriladi.

5-bob. Yakunlovchi qoidalar

30. Ekspert guruhining faoliyatini moddiy-texnik jihatdan ta'minlash tuman Kengashi tomonidan, shuningdek, qonun hujjatlarida taqiqlanmagan boshqa manbalar hisobidan amalga oshiriladi.

31. Ekspert guruhining faoliyati uning nizomiga va O'zbekiston Respublikasining qonunchilik hujjatlariga muvofiq ekanligini nazorat qilish tuman Kengashi raisi tomonidan amalga oshiriladi.

Korxonalar, muassasalar va tashkilotlarning rahbarlari Ekspert guruhi a'zosining tuman Kengashi va uning organlari faoliyatidagi ishtiroki davomida uning ish joyini (lavozimini) saqlagan holda, ishdan ozod qilishlari shart hamda bu vaqtda deputatning o'rtacha ish haqi saqlanib qolinadi.

32. Ekspert guruhining va tuman Kengashi raisining Ekspert guruhi faoliyati bilan bog'liq hujjatlari ustidan belgilangan tartibda shikoyat qilinishi mumkin.

33. Ekspert guruhi to'g'risidagi nizom va unga kiritiladigan o'zgartirish hamda qo'shimchalar tuman Kengashining qarori bilan tasdiqlanadi.

Xalq deputatlari Kattaqo'rg'on tumani
Kengashining
2025-yil 19-fevraldagi
VII-6-24-7-96-K/25 -son qaroriga
2-ilova

**Xalq deputatlari Kattaqo'rg'on tuman Kengashi huzuridagi
ekspert guruhi tarkibi**

T/r	Familiya, ismi va sharifi	Lavozimi
1	Nasriddinov Jamshid Tulkinovich	Kattaqo'rg'on tuman hokimi, xalq deputatlari tuman Kengashi raisi, <i>ekspert guruhi raisi</i>
2	Teshayev Muhiddin Xoliqulovich	Xalq deputatlari tuman Kengashi kotibiyati mudiri, <i>ekspert guruhi raisi o'rinbosari</i>
3	Niyazova Maryam Kadirovna	Xalq deputatlari tuman Kengashi deputati, Oliy Majlis senati a'zosi, <i>ekspert guruhi a'zosi</i>
4	Xudoyberdiyev Alisher Aktamovich	Xalq deputatlari tuman Kengashi deputati, <i>ekspert guruhi a'zosi</i>
5	Djurayev Ruzimurod Bozorovich	Xalq deputatlari tuman Kengashi deputati, <i>ekspert guruhi a'zosi</i>
6	G'ulomov Rustam Toshpo'latovich	Xalq deputatlari tuman Kengashi deputati, <i>ekspert guruhi a'zosi</i>
7	Abduraxmonov Jasur Bekpulatovich	Xalq deputatlari tuman Kengashi deputati, <i>ekspert guruhi a'zosi</i>
8	Mirzaxonova Dilorom Bakirovna	Xalq deputatlari tuman Kengashi deputati, <i>ekspert guruhi a'zosi</i>
9	Xusanov Ubaydullo Shokirovich	Xalq deputatlari tuman Kengashi deputati, <i>ekspert guruhi a'zosi</i>
10	Imomov Eldor Tursunmurotovich	Xalq deputatlari tuman Kengashi kotibiyati bosh mutaxassisi, <i>ekspert guruhi kotibi</i>